

Kapisilinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut Inatsisaanni nr. 18, 31. oktober 1996-imeersumi, § 5, § 8, § 10, § 10a, imm. 1, § 13, imm. 2, § 23, § 25, § 26, § 33, imm. 2 aamma § 34, imm. 3, ilaatigut Inatsisartut inatsisaanni nr. 6, 20. maj 1998-imeersukkut, Inatsisartut inatsisaanni nr. 5, 21. maj 2002-meersukkut, Inatsisartut inatsisaanni nr. 28, 18. december 2003-meersukkut, Inatsisartut Inatsisaanni nr. 17, 3. december 2009-meersukkut, Inatsisartut Inatsisaanni nr. 12, 3. december 2012-imeersukkut Inatsisartut Inatsisaat nr. 18, 3. juni 2015-meersoq kiisalu kingullermik Inatsisartut inatsisaatigut nr. 28 28. november 2016-imeersukkut allangortinneqarsimasut tunngavigalugit aalajangersarneqarpoq:

Kapitali 1

Atuuffia nassuiaatillu

Atuuffii

§ 1. Nalunaarut una Kalaallit Nunaata aalisarnikkut oqartussaaffigisaani kapisilinniarnermut atuuppoq:

- 1) Nunap Isuata kitaani NAFO-p sumiiffilersuiffiani 1-imi ingerlanneqartumut atuuppoq. Tunngaviusumik killigititami 40 sòmilit avataanni aalisarneq inerteqqutaavoq.
- 2) Kalaallit Nunaata Kangiata aalisarfiani. Paragraffit tulluuttut kisimik atuutissapput, tassalu § 6, § 7, § 8, § 9, § 10, § 11, § 12, § 13, § 14, § 15 aamma § 16. Tunngaviusumik killigititami 12 sòmilit avataani kapisilinniarluni aalisarneq inerteqqutaavoq.
- 3) Kapisillit kuuani kapisilinniarnermi.

Nassuiaatit

§ 2. Inuussutissarsiutigalugu kapisilinniarneq nalunaarummi matumani paasineqassaaq piset tamaasa ilaannaasaluunniit tuniniarnissaat siunertaralugu kapisilinniarnerut.

Imm. 2. Inuussutissarsiutigalugu kapisilinniarneq nalunaarummi matumani paasineqassaaq nammineq atugassanik kapisilinniarnerut.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarmissamut akuersisummik allagartaqartunit toqqaannartumik pisineq tigusinerlu.

Kapitali 2

Inuussutissarsiutigalugu kapisilinniarneq

Inuussutissarsiutigalugu kapisilinniarnermut piumasaqaatit

§ 3. Inuussutissarsiutigalugu kapisilinniarneq akuersissummik allagartallit kisimik nalunaarutip atuuffigisaani pisarineqarsimasunik kapisilinnik tuniniaasinnaatitaapput, takuuk § 1.

§ 4. Inuussutissarsiutigalugu kapisilinniarneq allagartat akuersissutit qinnuteqareernermit Naalakkersuisunit tunniunneqartut piumasaqaataapput.

Imm. 2. Allagartat imm. 1 naapertorlugu akuersissutit qinnuteqartunut piumasaqaatinik makkuninnga naammassinnittunut taamaallaat tunniussisoqarsinnaavoq:

- 1) Qinnuteqartoq inuiaqatigiinnut kalaallinut attuumassuteqavissoq, takuuk Aalisarneq pillugu Inatsisartut inatsisaanni § 3, imm. 4.
- 2) Qassutit kapisilinniutit aamma angallammik kapisilinniummik 12,8 meterit (42 fod) tikillugit tamakkerlugu takissusillimmik qinnuteqartup nammineq pigisaqarnissaa.
- 3) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik nalunaaruteqartoq.
- 4) Qinnuteqartut aalisarnerup siuliani akuersissummik peqarsimasut aalisarnerup siuliani nalunaaruteqartussaataaneq pillugu §§ 9 aamma 16 naapertorlugu naammassinnissimassapput.

Inuussutissarsiutigalugu kapisilinniarnermi piniutit

§ 5. Uku taamaallaat atorlugit inuussutissarsiutigalugu kapisilinniarneq akuersissutit qinnuteqareernermit Naalakkersuisunit tunniunneqartut piumasaqaataapput.

- 1) qarsorsat, imaluunniit
- 2) qassutit tasillugit minnerpaamik 140 mm-inik nigartallit atorlugit.

Imm. 2. Qassutit nigartaat uuttorneqassapput uuttuutit $\frac{1}{2}$ kiilumik oqimaalutserlugu nigartamut ikkunneqartut kingornatigullu nakkartinneqartut. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartaani tamani imm. 1, normu 2-mi piumasaqaatit naammassineqarsimassapput.

Imm. 3. Qassutit kapisilinniutit atorlugu tamarmik piginnittup atii tamaasa ilanngullugit imaluunniit taassuma angallataata atianik aamma umiarsualiviup ilisarnaataannik normuanillu nalunaaqutsigaassapput. Nalunaaqutsiussat imermit arrotinneqarsinnaassanngillat.

Imm. 4. Silap pissusaata taamaaliortoqarsinnaatippagu qassutit kapisilinniutit aalajangersumik akulikitsumillu napitaajarneqartassapput, taamaalluni aalisakkap pisarineqartup atorsinnaassusia ajornerulertussaajunnaarlugu.

Inuussutissarsiutigalugu kapisilinniarnerup aqunneqarnera

§ 6. Inuussutissarsiutigalugu kapisilinniarneq pisassiissutit aallaavigalugit nunami tunitsivinnut tunisassanik imaluunniit najukkani kalaalimineerniarfinnut najukkamilu suliffeqarfinnut

tuniniarneqartussanik aalisarnertut ingerlanneqarsinnaavoq.

§ 7. Inuussutissarsiutigalugu aalisarnermut § 6 malillugu Naalakkersuisut ukiut tamaasa, nunat tamalaat akornanni isumaqatigiissutit mianeralugit, Kalaallit Nunaanni kapisilittassanik aalajangersaassapput.

Imm. 2. Naalakkersuisut KNAPK-lu isumasioqatigereerlugu inuussutissarsiutigalugu kapisilinniarnissamut ulloq aallartiffissaq aalajangertassavaat. Ulloq aallartiffia nuna tamakkerlugu tusagassiutit aqputigalugit nalunaarutigineqartassaaq.

Imm. 3. Inuussutissarsiutigalugu kapisilinniarneq ulloq aalajangiiffigineqartoq sioqqullugu aallartinneqassanngilaq.

Imm. 4. Inuussutissarsiutigalugu kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutillugit) kiilunngorlugit taaneqartut iluanni pisinnaavoq.

Imm. 5. Inuussutissarsiutigalugu kapisilinniarnermut pisat Kalaallit Nunaata avataani taamaallaat pisiarineqarsinnaapput tuniniarneqarsinnaallutillu Naalakkersuisut akuersissuteqarnerisigut.

§ 8. Pisassiissutit § 7 malillugu aalajangikkat tamakkerlugit pisiarineqarnissaat qanillippat, Naalakkersuisut nalunaarutigissavaat, qaqugu inuussutissarsiutigalugu kapisilinniarneq kiisalu taamatut aalisarnermut pisanik pisineq aamma tunisineq unissanersoq.

Imm. 2. Imm. 1 malillugu nuna tamakkerlugu tusagassiutit aqputigalugit nalunaarutigineqartassaaq.

Imm. 3. Imm. 1 malillugu aalisarneq unitsinneqarpat, inuussutissarsiutigalugu kapisilinniarneq kiisalu taamatut aalisarnermut pisanik pisiortorneq tunisinerlu inerteqqutaalissapput.

Inuussutissarsiutigalugu kapisilinniarnermut pisanik nalunaaruteqartarneq

§ 9. Inuussutissarsiutigalugu aalisartunit kapisilittarineqartut tamarmik Kalaallit Nunaanni Aalisarsinnaanermut Akuersissutininik Nakkutilliisoqarfimmut (KANUAANA-mut) ingerlaannaq nalunaarutigineqassapput.

Imm. 2. Tunisat annertussusii "niaquernagit erlaveerlugit" nalunaarutigineqarpata naatsorsueriaaseq 1,11 atorineqassaaq aalisakkat ilivitsunngortillugit naatsorsorneranni.

Imm. 3. Inuussutissarsiutigalugu aalisarnissamut akuersissutillit kalaalilimineerniarfinni toqqaannaq tunisartut tulaassinerit tamaasa pillugit nalunaaruteqartassapput. Nalunaaruteqarnermi kapisillit pisat tamarmik ilaatinneqassapput. Pisat pillugit nalunaarutiginninneq nalunaarummi ilanngussaq 1 atorlugu pisassaaq. Kapisilinnik tamatigut tulaassinerit kingorna nalunaarutiginninneq uunga nassiunneqartassaaq: KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl. Sullissivik.gl-ikkut aamma nalunaarutiginnittoqarsinnaavoq.

Kapitali 3

Inuussutissarsiutiginagu kapisilinnik aalisarnermut pisanik nalunaaruteqartarneq

Inuussutissarsiutiginagu kapisilinnik aalisarnermut piumasaqaatit

§ 10. Inuussutissarsiutiginagu kapisilinniarnissamut piumasaqaataavoq akuersissut qinnuteqareernikkut Naalakkersuisunit tunniunneqartoq.

Imm. 2. Imm. 1 malillugu qinnuteqartunut piumasaqaatinik makkuninnga naammassinnittunut taamaallaat akuersissutininik tunniussisoqarsinnaavoq:

- 1) Aalisarneq pillugu Inatsisartut inatsisaanni § 8, imm. 1-mi piumasaqaatinik naammassinnissimasunut.
- 2) Qinnuteqartunut aalisarnerup siuliani akuersisummik peqarsimasunut aalisarnerup siuliani nalunaaruteqartussaaitaaneq pillugu §§ 15 aamma 16 naapertorlugu naammassinnissimasunut.

Inuussutissarsiutiginagu kapisilinniarnermi piniutit

§ 11. Uku taamaallaat atorlugit inuussutissarsiutiginagu kapisilinniartoqarsinnaavoq:

- 1) qarsorsat, imaluunniit
- 2) qassutit ataatsit 2000-inik nigartallit, taakkua tasillugit nigartaat minnerpaamik 140 mm-iusut.

Imm. 2. Qassutit nigartaat uuttorneqassapput uuttuutip $\frac{1}{2}$ kiilumik oqimaalutserlugu nigartamut ikkunneratigut kingornatigullu nakkartinneqatigut. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartaani tamani imm. 1, normu 2-mi piumasaqaatit naammassineqarsimassapput.

Imm. 3. Qassutit piginnittup atii tamaasa ilanngullugit nalunaaqutsigaassapput. Nalunaaqutsiussat imermit arrortinneqarsinnaassanngillat.

Imm. 4. Silap pissusaata taamaaliortoqarsinnaatippagu qassutit kapisilinniutit aalajangersumik akulikitsumillu napitaajarneqartassapput, taamaalilluni aalisakkap pisarineqartup atorsinnaassusia ajornerulertussaajunnaarlugu.

Inuussutissarsiutiginagu kapisilinniarnernup aqunneqarnera

§ 12. Inuussutissarsiutiginagu kapisilinniarneq pisassiissuteqarnikkut ingerlanneqarsinnaavoq.

§ 13. Inuussutissarsiutiginagu aalisarnermut, takuuk § 12, Naalakkersuisut ukiut tamaasa nunat tamalaat akornanni isumaqatigiissutit mianeralugit kalaallit kapisilittassanik aalajangersaassapput.

Imm. 2. Inuussutissarsiutiginagu kapisilinniarnernup inuussutissarsiutigalugu aalisarneq aallarteqatigissavaa, takuuk § 7, imm. 2.

Imm. 3. Inuussutissarsiutiginagu kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutillugit) kiilunngorlugit taaneqartut, iluanni pisinnaavoq.

§ 14. Kapisilittassiissutit § 13-mi aalajangikkat tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutiginagu kapisilinniarneq unissanersoq.

Imm. 2. Imm. 1 malillugu nuna tamakkerlugu tusagassiutit aqqutigalugit nalunaarutigineqartassaaq.

Imm. 3. Aalisarneq unitsinneqarpat, takuuk imm. 1, inuussutissarsiutiginagu kapisilinniarneq qanorluunniit ingerlanneqartoq inerteqqutaalissaaq.

Inuussutissarsiutiginagu kapisilinnik aalisarnermit pisanik nalunaaruteqartarneq

§ 15. Inuussutissarsiutiginagu kapisilinniarnermi kapisillit pisarineqartut tamarmik KANUAANA-mut nalunaarutigineqassapput.

Imm. 2. Pisat pillugit nalunaarutiginninneq nalunaarummi ilanngussaq 1 atorlugu pisassaaq. Imaluunniit Sullissivik.gl-ikkut aamma nalunaarutiginnittoqarsinnaavoq. Kapisilinnik qassutinik napitaajaanerup kingornatigut, takuuk § 11, imm. 4, nalunaarutiginninneq apuutereernermi ingerlaannaq uunga nassiuuneqartassaaq: KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanog.gl.

Kapitali 4

Inuussutissarsiutigalugu aamma inuussutissarsiutiginagu kapisilinniarnermi pisaqanngitsoornerit nalunaarutigineri

§ 16. Inuussutissarsiutigalugu kiisalu inuussutissarsiutiginagu kapisilinniarnissamut akuersissutaatillit tamarmik kapisilinniarsimanngitsut, tamanna ilanngussaq 1 atorlugu nalunaarutigissavaat.

Imm. 2. Inuussutissarsiutigalugu kiisalu inuussutissarsiutiginagu kapisilinniarnissamut akuersissutaatillit tamarmik kapisilinniarsimasut kapisilinnngitsoorsimasullu, tamanna ilanngussaq 1 atorlugu nalunaarutigissavaat.

Imm. 3. Akuersissutinik atorneqanngitsunik pisaqannginnermillu nalunaaruteqarneq nalunaarummi ilanngussaq 1 aqutigalugu pissaaq. Imaluunniit Sullissivik.gl-ikkut aamma nalunaarutiginnittoqarsinnaavoq. Nalunaarutiginninneq kapisilinniarnerup matoreernerani kingusinnerpaamik ullut 30-t qaangiunneranni uunga nassiuuneqassaaq: KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanog.gl.

Kapitali 5

Pineqaatissiissuteqartarneq

§ 17. § 1, nr. 1-imik aamma nr. 2-mik, § 3-mik, § 4-mik, § 5, imm. 1-mik, imm. 3-mik, aamma imm. 4-mik, § 7, imm. 3-mik, 4-mik aamma 5-imik, § 8, imm. 3-mik, § 9-mik, § 10, imm. 1-imik, § 11, imm. 1-mik, imm. 3-mik aamma imm. 4-mik, § 13, imm. 3-mik, § 14, imm. 3-mik, § 15-imik aamma § 16-imik unioqqutitsineq Kalaallit Nunaanni Pinerluttulerinermik Inatsit naapertorlugu akiliisitsinermik kinguneqarsinnaapput.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Imm. 3. Kalaallit Nunaanni Pinerluttulerinermi inatsisimi malittarisassat malillugit imm. 1-imi aalajangersakkanik unioqqutitsineq arsaarinnittoqarsinnaavoq.

Imm. 4. Akiliisitsissutit imm. 1-2 malillugit pineqaatissiissutigineqartut Nunatta Karsianut pisassanngortinneqassapput.

Kapitali 6

Atortuulersitsineq, atorunnaarsinneqarnissaa kiisalu ikaarsaariarnermi aalajangersakkat

§ 18. Nalunaarut una atortuulissaaq ulloq 1. september 2020-mi.

Imm. 2. Peqatigitillugu Namminersorlutik Oqartussat kapisilinniarneq pillugu nalunaarutaat nr. 5 21. september 2018-imeersoq atorunnaarpoq.

Namminersorlutik Oqartussat, ulloq af 28. august 2020

Jens Immanuelson

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut